

Wie man das war ort/oder den rechten Sonnen grad vinden soll.

Medium
motum
solis.

Das Drit Capitel.

Dieweyl auß der erkantnuß des waren Sonnen grads vil andere nutzbarkeit entspringenn/welliche one denselben Sonnen grad durch andere weg so leichtlich nit mögen gelernet werden/habe ich in zum ersten wollen finden leeren/ Deshalb so du in Begerest zuwissen/so lege die Regel die auff des Astrolabiums rucken vmbgeet/ auff denselben tag desselben monats/auff wellichen du das Begerest zuwissen/vñ darnach so die Regel also vnerruckt still lige/ schaw außwendig im thiercreyß/welchem grad die linia fiducie/oder regel berüre/ dasselb ist dann auff denselben tag zu mittag der ware grad der Sonnen/als pald vindest das zeychen darbey geschriben vnd die zal/ Darumb so weystu nun/das die Sonn auff denselben tags mittag eben in dises zeichens grad ist/ Vnd das trifft in den gemeinē jarn zu/aber in einem schalt jar müßtu im also thun/für den 29.tag des Hornungs/nym den ersten tag des Merzens/ vnd für den ersten nym den andern/ vnd für den andern den dritten zc.vnd also far fürsich durch das gang jar hinaus/dan der Hornung hat in Schalt jarn 29. tag/aber in gemeinē jarn nur 28.darumb muß man stet ein tag vberhupffen.

Grad der
Sonnen.

Nota in
anno
bisextili.

Wie man den gegengrad der Sonnen

Nadair genant vinden soll.

Das iiii. Capitel.

Astemat / das ist Nadair/der gegen vber gesagt grad der Sonnen im thiercreyß/welchen du also findest/lege die regel auf den waren Sonnengrad ins thiercreyß/so weyst dir pald das ander ort der regel gleich gegenn dem grad vber im thiercreyß/ den gegengrad oder Nadair

Nadair
Begen
grad